

KPDNHEP lancar Pelan Antirasuah Organisasi

PUTRAJAYA - Kementerian Perdagangan Dalam Negeri dan Hal Ehwal Pengguna (KPDNHEP) menjadi kementerian pertama yang melancarkan Pelan Antirasuah Organisasi (OACP KPDNHEP) 2019-2023.

Menterinya, Datuk Seri Saifuddin Nasution Ismail berkata, pelan tersebut selaras dengan Pelan Antirasuah Nasional yang dilancarkan pada Januari lalu.

"KPDNHEP menterjemahkan hasrat dan inisiatif Perdana Menteri, Tun Dr Mahathir

Mohamad untuk memerangi rasuah di peringkat kementerian," katanya pada sidang media selepas melancarkan pelan OACP KPDNHEP pada perhimpunan bulanan kementerian berkenaan di sini semalam.

Menurutnya, kementerian akan menggerakkan program advokasi kepada kira-kira 3,000 kakitangannya.

"Program advokasi perlu diadakan supaya pelan OACP KPDNHEP difahami dan dihayati oleh kesemua kakitangan.

"Kita harap dalam menjalankan tugas, mereka dapat

menterjemahkannya, tahu apa yang boleh dan tidak," katanya.

OACP KPDNHEP memberi fokus kepada empat bidang keutamaan iaitu penguatkuasaan undang-undang, pentadbiran sektor awam, perolehan awam dan tadbir urus terbaik serta berintegriti tinggi.

Empat bidang tersebut adalah berasaskan isu dan cabaran yang dihadapi melalui aktiviti utama yang memberi impak kepada KPDNHEP sebagai kementerian yang bertanggungjawab melindungi hak pengguna dan peniaga.



Saifuddin (dua dari kanan) meneliti isi kandungan Pelan Antirasuah Organisasi KPDNHEP 2019-2023 di Putrajaya semalam.

KPDNHEP lancar Pelan Antirasuah Organisasi: Saifuddin Nasution

BERNAMA | | 22 Oktober 2019



Saifuddin Nasution (dua, kanan) meneliti isi kandungan Pelan Antirasuah Organisasi KPDNHEP 2019-2023 selepas melancarkan pelan itu pada majlis Perhimpunan Bulanan di KPDNHEP hari ini. - Foto Bernama

AA

PUTRAJAYA - Kementerian Perdagangan Dalam Negeri dan Hal Ehwal Pengguna (KPDNHEP) hari ini melancarkan Pelan Antirasuah Organisasi (OACP) 2019-2023, sekali gus menjadi kementerian pertama berbuat demikian.

Pelan yang dilancarkan menterinya, Datuk Seri Saifuddin Nasution Ismail itu memfokuskan kepada empat bidang keutamaan iaitu penguatkuasaan undang-undang, pentadbiran sektor awam, perolehan awam serta tadbir urus dan berintegriti tinggi.

Saifuddin berkata, kementerian itu mempunyai 3,000 kakitangan dan 2,300 daripadanya adalah pegawai penguat kuasa yang mungkin terdedah dengan hal berkaitan integriti dan rasuah, selain mempunyai 11 akta yang membabitkan bidang penguatkuasaan.

Pelan ini akan digerakkan ke semua kakitangan supaya mereka memahami dan menjalankan tugas mereka dan mengetahui apa yang perlu dan dielakkan ketika menjalankan tugas," katanya dalam sidang media selepas pelancaran pelan itu pada majlis perhimpunan bulanan Kementerian di sini hari ini.

Saifuddin berkata, empat bidang keutamaan itu dipilih berasaskan isu dan cabaran yang dihadapi serta memberi impak kepada Kementerian yang bertanggungjawab untuk melindungi hak-hak pengguna dan peniaga.

"Walaupun Kementerian tidak terlibat banyak dengan perolehan, namun bidang-bidang lain seperti penguat kuasa, perlesenan, pembayaran subsidi, masih kita anggap penting bagi Kementerian beri tumpuan dalam aspek membina integriti yang tinggi," katanya.

Menurutnya, OACP KPDNHEP diwujudkan sejajar dengan kehendak Pelan Antirasuah Nasional (NACP) yang dilancarkan Perdana Menteri, Tun Dr Mahathir Mohamad pada 29 Januari lepas serta turut mendapat panduan dan nasihat daripada Pusat Governans Integriti dan Antirasuah (GIACC), Institut Integriti Malaysia dan Suruhanjaya Pencegahan Rasuah Malaysia.

Pada majlis itu juga, Saifuddin Nasution turut melancarkan sistem MySAFE yang sebelum ini dikenali sebagai MyStandard, iaitu sistem yang dibangunkan oleh Kementerian sejak Jun 2012, untuk memudahkan pihak industri melaksanakan proses pematuhan terhadap peraturan standard keselamatan mainan kanak-kanak dan bateri primer secara dalam talian.

"Sistem MySAFE dijangka beroperasi secara 'live' menggantikan MyStandard pada bulan hadapan dan sesi taklimat sistem MySAFE akan diadakan sebelum sistem itu beroperasi secara live," katanya.

Antara yang ditambah baik melalui MySAFE ialah fungsi yang membolehkan pengguna menyemak status pendaftaran syarikat, membuat carian mengenai penarikan balik barang dari pasaran dan barangan yang dilarang penjualannya. - Bernama

Artikel Penuh : <https://www.sinarharian.com.my/article/53519/BERITA/Nasional/KPDNHEP-lancar-Pelan-Antirasuah-Organisasi-Saifuddin-Nasution>

© 2018 Hakcipta Terpelihara Kumpulan Karang kraf